

# Երանի

Կաթիլ կաթիլ անձրեւ կու գայ,  
իսկ խխունջիկը՝  
Խուճկուլուլուն  
տրտո՞ւմ տխուր կը սողայ...

Ինչո՞ւ համար իր ընկերը՝  
Թրթուրիկ Թութուպան  
մէկ երկու, երեք չորս,  
հինգ վեց, եօթը ութը,  
ինը տասը,  
տասը եւ վեց,  
տասնվեց հատ  
տոտիկ ունի,

իսկ ինքը  
տոտիկ չունի...  
Ո՛չ մէկ տոտիկ...

Անտրամաբանական...  
Անտրամաբանական...

Թրթուրիկ Թութուպան  
կը բացատրէ  
թէ՝  
տասը եւ վեց,  
տասնվեց հատ տոտիկ ունենալը  
դիւրին բան չէ...

Ընդհակառակը,  
շատ դժուար է,  
գլխու ցաւ է...  
Մէկ երկու,  
մի տոտիկը առջեւ դնէ...  
Երեք չորս,  
մի տոտիկը առջեւ դնէ...

Հինգ վեց,  
աջը ձախը...  
Եօթը ութը,  
հաշիւ ըրէ...  
Ինը տասը,  
վայ սխալ է,  
հանգոյց է...

Հանգոյցը  
ինչպէս քակէ,  
շատ դժուար է...  
Ասի կեանք է...

Կաթիլ կաթիլ անձրեւ կու գայ,  
իսկ խխունջիկը՝  
Խուճկուլուլուն  
տրտո՞ւմ տխուր կը սողայ...

Ինչ լա՛ւ կ'ըլլար  
Թրթուրիկ Թութուպան  
քանի մը տոտիկ  
իրե՛ն տար...

Խուճկուլուլուին՝  
վեց տոտիկ,  
Թութուպային՝  
տասը տոտիկ,  
կ'ըլլային  
երկու ընկեր  
երջանիկ...

Երանի...